



**S**anctus Vrsus & Victor cum quibusdam socijs  
 Thebanę legionis milites fuerunt, qui post cru-  
 delem eius legionis cum Mauritio duce cedē, quę  
 Agauni Valesiorum à Maximiano Cæsare facta  
 est, euaserant, atq; Solodurū peruenerant, speran-  
 tes sanguinolentum Cæsaris animum sociorū san-  
 guine satiatum esse. Erat autem tum Hirtatus ijs in  
 locis Romanorum Cæsarum præfectus. Huic ita-  
 que Maximianus in mandatis dedit, ut reliquias  
 eius legionis ad sacrificandum dijs impelleret, aut  
 suprema pœna afficeret. Propterea Hirtatus Vr-  
 sum cum suis socijs in captiuitatem collocauit, at-  
 que ad sacrificia impia Mercurio Deo eius loci pa-  
 trono, cogere statuit. cum autem illi neq; minis neq; blanditijs eò pertrahi po-  
 tuerunt, præfectus eius loci eos paulo supra Solodorum, Anno circiter 304,  
 ultimo supplicio affecit. in quo etiam uera fide pijs martyres constanter perse-  
 uerant. Victoris corpus postea à Domitiano Episcopo Geneuam transla-  
 tum, atq; in templo S. Victoris sepultum fuit. S. Vrsus uerò Solodori condi-  
 tus requiescit. In eius honorem postea Vuerthrada mater Caroli Magni, An-  
 no Christi 800, celebre templum ædificauit, atq; S. Vrsi ossa sub maiori altari  
 collocari in lapidea arca iussit, cum argentea lamina, quę talē inscriptionem  
 habebat: Conditur hoc tumulo sanctus Thebaidus Vrsus. Cum enim alta-  
 re illud, Anno 1519 renouaretur, arca illa inuenta est. Stumpff. Monst. 3.